

Aningaasaliisartut pilersaarnissaannut periarfissanik misissuineq

NUNATTA TIMERSORTARFISSUA
SULEQATIGIISSITAQ

Imarisai

Tunuliaqut.....	2
Inatsisit tunngavigineqartut	3
Nunatta timersortarfissua	3
Piginnittuuneq	6
Nunatta Karsianiit aningaasaliissutit	7
Ingerlatsinermut aningaasaliissutit	7
Aningaasaliissutit inatsisitigut pisussaaffiusut	7
Tapiissutit aningaasaliissutit	7
Isertitassatut aningaasaliissutit	8
Sanaartornissami aningaasaliissutit	8
Aningaasalissinissamut periarfissat	9
Pisortat namminersortullu peqatigiinnerat:.....	9
Aningaasaleeqataaneq:	10
Aningaasaateqarfinniit aningaasat aamma aningaasaliisut:	10
FIFA:	11
Pisortanit pigineqartoq ingerlatseqatigiiffik aningaasaliisartoq.....	11
Nunatta timersortarfissuanik ingerlatsineq	12
Kommunimiit aamma Nunatta Karsianiit aningaasaliissutit	12
Suliniutit attuumassuteqartut	13
Inerniliineq.....	15

Tunuliaqut

Inatsisartut 2019-mi ukiakkut ataatsimiinnermi immikkoortoq UKA 2019/32 Inatsisartunit suliarineqarpoq aalajangiillutillu Nunatta timersortarfissaanik sanaartornissamut aningaasaliisussarsiuunnissaanut periarfissanik misissuisussamik suleqatigiissitamik pilersitsinissamut Naalakkersuisut peqquneqassasut. Inatsisartunit taamatut Naalakkersuisut peqquneqarnissaat sioqqullugu Inatsisartuni immikkoortoq UPA 2015/22-i aqqutigalugu Nunatta timersortarfissaa pillugu suliniut pilersaarusoqqullugu suliakkerneqarsimapput. "Nunatta timersortarfiata suliniutiginissaanut pilersaarut" november 2016-imi agguanneqarpoq.

Naalakkersuisut Inatsisartuni aalajangiineq tunuliaqutaralugu, suleqatigiissitamik pilersitsivoq, suleqatigiissitap aningaasalersuinissamut modelit assigiinngitsut, avataanit aningaasaliisussarsiornissaq eqqarsaatigalugu, nunatta timersorfissaanik sanaartornissamik pilersaarummik (kakkiussa qakuuk) suliaqassasooq, FIFA-p piumasaqaataanut naapertuuttumik.

Suleqatigiissitamiipput Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfimmiit, Ineqarnermut Attaveqaasersuutinullu Naalakkersuisoqarfimmiit, Aningaasaqarnermut Naligiissitaanermullu Naalakkersuisoqarfimmiit, Kommuneqarfik Sermersuumiit aamma Timersoqatigiit Kattuffianniit sinniisut. Sinniisut tamarmik sanaartugassanut annertunerusunut aningaasalersuinnaasunik nassaarnissamik ilisimasaqarput.

Suleqatigiissitaq tulluurtut isigaa Nunatta timersortarfissaanik sanaartornissamut aningaasaliisussarsiuunnissaanut periarfissanik qulaajaanissamut pissutsit makku qulaajaaffigineqassasut:

- Piginnittuuneq
- Aningaasalissinissamut periarfissat
 - Pisortat namminersortullu peqatigiinnerat
 - Peqataalluni/avitseqateqarluni aningaasaliineq
 - Aningaasaateqarfinniit tapiissutit
 - Aningaasaliisut
 - FIFA
- Ingerlatsineq
 - Nunatta Karsia
 - Avitseqatigiilluni ingerlatsineq - kommuni aamma Nunatta Karsia
 - Aningaasaateqarfiit

Nassuiaammi matumani pissutsit assigiinngitsut pillugit kiisalu periarfissat suut ilimanaateqarnerpaatut isigineqarnersut pillugit nassuiaasoqarpoq. Tassunga ilanngutissaaq suliap ingerlateqqinnissaanut suleqatigiissitamit inassutigineqartut.

Inatsisit tunngavigineqartut

Timersornermut tunngasut timersorneq timigissarnerlu pillugit Inatsisartut inatsisaat nr. 15, 6. juni 2016-imeersumi (Timersorneq pillugu inatsit) malittarisassaqaartinneqarpoq. Timersorneq pillugu inatsimmi kapitali 3-mi pisortani oqartussat akisisussaannerat suliasatigullu agguarsimaneri pillugit aalajangersakkat aalajangersarneqarsimapput.

Timersorneq pillugu inatsimmi § 14 naapertorlugu timersortarfinnik sanaartornermut, iluarsaassinermut aqqissuussinermullu Naalakkersuisut tapiissuteqarsinnaapput. Imm. 2-imi aalajangersarneqarpoq imm. 1 naapertorlugu timersortarfinnut aqqissuussinernullu tapiissutit annerusumik nuna tamakkerlugu nunallu immikkoortuini timersortarfinnut tutsinneqassasut. Timersorneq pillugu inatsimmut nassuiaammi nuna tamakkerlugu aamma nunap immikkoortuini timersortarfinni qanoq paasineqassanersut erseqqinnerusumik allaaserineqarsimapput. Nuna tamakkerlugu timersortarfinni paasineqarpoq timersortarfik innuttaasunit nunamit tamarmeersunit akuttunngitsumik atugassatut eqqarsaatigineqartut imaluunniit nunamut tamarmut atugassiaasut, assersuutigalugu nunap arsaattarfissua. Nunap immikkoortuani timersortarfinni paasineqarpoq timersortarfik nunap immikkoortuani innuttaasunit akuttunngitsumik atorneqartartussatut eqqarsaatigineqartoq. Nunap immikkoortuani kommunit marluusinnaapput amerlanerullutilluunniit.

Timersorneq pillugu inatsimmi § 16 naapertorlugu kommunalbestyrelsi timersortarfiit sanaartornerinut, iluarsartuunnerinut aqqissuunnerinullu tapiissuteqarsinnaavoq. Imm. 2-mi aalajangersarneqarpoq timersortarfinnut sanaartornermut, iluarsaannerinut aqqissuunnerinullu tapiissutit, tak. imm. 1, sumiiffinni timersortarfinnut tapiissutaanersartut. Imm. 3-mi aalajangersarneqarpoq kommunalbestyrelse ininut silamilu ingerlatsivinnut timersoqatigiiffinnit pigineqartunut attartorneqartunulluunniit ingerlatsinermit tapiissuteqarsinnaavoq. Imm. 4-mi aalajangersarneqarpoq kommunalbestyrelsi sumiiffimmi timersornikkut timigissarnikkullu sammisanut tapiissuteqarsinnaavoq, tassunga ilanngullugit sumiiffimmi timersoqatigiiffinnut aamma timersornermi klubinut tapiissutit. Imm. 5-imi aalajangersarneqarpoq Naalakkersuisut tamanna pillugu kommunalbestyrelsimik isumasioqateqareerlutik tapiissutit imm. 1-4-mi taaneqartut pillugit maleruagassanik aalajangersaasinnaapput.

Tamatuma saniatigut timersorneq pillugu inatsimmi § 17-mi aalajangersarneqarpoq timersortarfiit sanaartornerinut, iluarsaannerinut aqqissuunnerinullu imaluunniit ininik silamilu timersortarfinnik, timersoqatigiiffinnit pigineqartunik attartorneqartunilluunniit ingerlatsinermit aningaasartuutitut kommunalbestyrelsi allaluunniit tapiissuteqarpata tapiissutigineqartut ilaannik Naalakkersuisut utertitsisinnaapput.

Nunatta timersortarfissua

Inatsisartut 2015-mi upernaakkut ataatsimiinneranni Siumut sinnerlugu Inatsisartuni ilaasortaq Anders Olsen imatut siunnersuuteqarpoq: "Nunatta inuiattut timersornikkut unammersuaartarfissaanik qulisamik "National stadion"-imik pilersitsinissaq siunertaralugu Naalakkersuisut pilersaarummik kingusinnerpaamik UKA2016-mi saqqummiunneqartussamik suliaqaqqullugit peqquneqarnissaannik Inatsisartut aalajangiiffigisassaattut siunnersuut. Pilersitsinissamut pilersaarummi misissorneqassapput

unammersuortarfissap ingerlanneqarnerani sanaartornissamilu aningaasatigut pissutsit atuuttussat.” (UPA2015/22).

Nunatta timersortarfiata suliniutiginiissaanut pilersaarut 2016-ip naanerani Inatsisartunut agguanneqarpoq. Suliniummi pilersaarut ingeniorit siunnersuisartut S&M Verkis-imit suliarineqarpoq tassaniillutik timersortarfimmik sanaartornermut ingerlatsinermullu tunngasut suliassatigut aningaasaqarnikkullu pissutsit. Suliniummi pilersaarut ilanngussatut kakkiunneqarpoq.

Suliniutip pilersaarutaanit takuneqarsinnaavoq Nunatta timersortarfiani qulisami siunertaq tassaasoq nunani tamalaani isikkamik arsaannikkut pissartanngorniunnerni Kalaallit Nunaata peqataasinnaaneranut ammaassinnaaq. Manna tikillugu Kalaallit Nunaat nunani tamalaat isikkamik arsaattunut peqataasinnaasimangilaq, nunanit tamalaanit akuerineqartumik arsaattarfimmik amigaateqarnek pissutaanerulluni. Nunani tamalaanisullu angissuseqartumik nunatta qulisamik ivigaaraasartalmik timersortarfeqalernermi FIFA-mi ilaasortanngorsinnaaneq periarfissaalissaq.

Kingorna Inatsisartut 2017-mi ukiakkut ataatsimiinneranni Inatsisartunut ilaasortaq Anders Olsen, Siumut, imatut siunnersuuteqarpoq: “ Nuummi inissisimasussamik Nunatta inuiattut timersornikkut unammersuortarfissaannik pilersaarutip FIFA-p piumasaqaataanut naapertuuttumut aningaasalersorneqarnissaannut periarfissanik misuissuisussamik suleqatigiisitamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut” (UPA 2017/114).

Aningaasaqarnermut Akileraartarnermullu Ataatsimiititaliamit isumaliutissiisummi Inatsisartunit Naalakkersuisunillu amerlasuut siunnersuummut tapersersuinerat ataatsimiititaliamit maluginiarneqarpoq ilaatigullu suleqatigiissitap katitigaaneranut, suliassamut tunngavissaliornissamut aningaasalersuinissamullu naleqqiullugu oqaaseqaateqarluni. Ataatsimiititaliamit maluginiarneqarpoq allat aningaasaleeqataaffigisaannik aqqjissuussinermik suliaqarnissaq pisariaqassasoq, tassa sanaartornermut kingornalu taassuma ingerlanneqarneranut naleqqiullugu Namminersorlutik Oqartussat kisimiillutik tamatumingga aningaasalersuisinnaangimmata. Ataatsimiititaliaq aamma isumaqarpoq tulluassasoq suleqatigiissitaq pilersinneqarsimasoq suliniummi taamatut ittumi Kommuneqarfik Sermersuup peqataatinneqarsinnaanerani aamma tamatuma qanoq pisinnaanerani misissuissappat.

Siunnersuut Inatsisartunit akuerineqarpoq, Naalakkersuisullu 2020-mi suleqatigiissitamik pilersitsillutik ukunanga sinniisuuffigineqartoq: Ineqarnermut Attaveqaasersuutinullu Naalakkersuisoqarfik, Aningaasaqarnermut Naligiissitaanermullu Naalakkersuisoqarfik, Nuuk City Development aamma Kalaallit Arsartartut Kattuffiat (KAK). Nuuk City Development-ip atorunnaarsinneqarnerata kingorna taanna Kommuneqarfik Sermersuumut sinniisumit taarserneqarpoq. Suleqatigiissitaq misissuinerminik UKA2020-mi saqqummiussisimasussaagualuarpoq. Misissuinerli ilaatigut 2021-mi Inatsisartunut qinersisoqartussanngornera pissutigalugu naammassineqarsinnaasimangilaq.

Taamaattorli Kalaallit Arsartartut Kattuffiata (KAK) nalunaarutigisimallugu Dansk Bold Union-ip (DBU) inassuteqartoqarneratigut CONCACAF-imi ilaasortanngornissaq qinnutiginiarlugu. KAK aallaqqaammut Europami arstartartut katuffissuanni UEFA-mi ilaasortanngornissamik takorluugaqarsimavoq. Kisianni Danmarkimi arstartartut kattuffianni DBU-mit tapersersorneqarnani ilaasortanngornissaq ajornarsimavoq, taarsiullugulu CONCACAF-imi ilaasortanngornissaq pillugu qinnuteqaasiorniartut. CONCACAF tassaavoq Amerikami Avannarlermeersuniit, Amerika Qiterlermeersuniit aamma Caribiameersuniit nunanit arstartartut

kattuffiitut timersornikkut suliniaqatigiiffik. Taamaalilluni KAK siunissaq pillugu nutaamik takorluugaqalerpoq.

Kalaallit Nunaat CONCACAF-imut ilaalissappat piumasaqaatit arlallit naammassineqarsimassapput. Kalaallit Nunaat arsaattarfeqassaaq isiginnaartunut inissaqartoq, isiginnaartullu tamarmik issiasinnaassallutik, tassa imaappoq minnerpaamik qulisaasaqassalluni. Sumiiffik nunanit tamalaanit mittarfimmit qaninnermiit 100-150 km-init ungasinnerussanngilaq. Arsaattarfik ivigaaraasartalik FIFA-mit akuerineqarsimassaaq, aamma arsaattarfik ivigaaraasartalik aserfallatsaaliorneqarsinnaassalluni. Arsaattarfik atortulersugaasimassaaq, taamaalilluni unammisoqassatillugu arsaattarfik piareersimassalluni. Arsaattarfik qullilersugaasimassaaq, minnerpaamik 1.000 Vertical EV LUX. Arsaattarfimmili piginnaasat pillugit aalajangersimasunik piumasaqaateqanngilaq, aamma arsaattarfiup illup iluaniittariaqarnera pillugu piumasaqaateqarnani.

Misissuinermit matumani Nunatta timersortarfissaanik, FIFA-p malittarisassai malillugit akuerineqartumik, sanaartornermut atatillugu suliniummi pilersaarummi allanneqartutut aningaasalersuisinnaasunut atatillugu aningaasalersuisinnaasunik periarfissanik misissuinissaq sammeneqarpoq. Football Stadiums Guidelines 2022 FIFA-mi qupperneq 8-mut innersuussisoqarpoq.

Piginnittuuneq

Nunatta timersortarfissaanut piginnittuunermi periarfissat assigiinngitsuusinnaapput. Namminersorlutik Oqartussanit pigineqartoq, Namminersorlutik Oqartussanit/kommunimit pigineqartoq imaluunniit pingajuattut allatut aqqissuunneqarsimasoq. Aallaaviatigut piginnittuuneq aningaasalersuinerup katitigaanerani aalajangerneqassaaq. Allaanerusumik aqqissuussineq tassaasinnaavoq suleqatigiinnermi/piginnittuunermi kommunit tamarmik peqataallutik aamma nunatta timersortarfia ataatsimoorfigalugu. Kommuneqarfik Sermersuumi oqaatigineqarpoq Namminersorlutik Oqartussat/kommunilu piginnittuunissaat toqqarneqarpat kommuni kisimiilluni piginnittutut inissisimalluni akisussaasinnaanani.

Nunatta Karsianiit Nunatta timersortarfiata sanaartornerata tamakkiisumik annerpaartaaluunniit aningaasalersorneqarpat Namminersorlutik Oqartussat piginnittuusariaqassapput. Taamaaqataa atuuppoq tamakkiisumik annertunersaanilluunniit aningaasalersuinermik kommuni ataaseq qulakkeerisussanngorpat. Taamaattorli pingaaruteqartutut isigineqartariaqarluni pisortanit namminersortullu peqatigiillutik imaluunniit aningaasaateqarfiit avataaneersut aningaasalersuinerisa kingunerisaanik pisortat piginnittuusariaqassallutik. Peqatigisaanik piginnittuuneq siunissami ingerlatsineramik taassumalu aningaasalersuineranik aallaaveqartariaqarluni.

Timersornikkut atortut amerlanersaat ullumikkut aqqissugaanikkut kommunini inissisimapput, atortullu ilai nammineq siulersuisoqarlutik pisortat sullissiviit nammineq pigisutut aqqissugaallutik. Taakku pisortat sullissivii nammineq pigisut kommunit annertunerpaatut attartortigivaat imaluunniit tapiissuteqartuullutik.

Nunatta timersortarfianik pilersitsinermi piginnittuuneq qanoq ittoq atorneqassanersoq isumaliutigineqassaaq.

Nunatta timersortarfia timersortarfiussaaq nuna tamakkerlugu inissisimasoq taamaattumillu sanaartornermut kingornalu ingerlatsinermut Namminersorlutik Oqartussat tapeeqataappata pissusissamisussalluni.

Ataasiinnarmik piginnittoqarluni piginnittoqarnerup kingunerissavaa ingerlatsinermut aningaasartuutit pinngitsoorani piginnittumit ataasiusumit taassuminnga aamma aningaasalersorneqarnissaat, piginnittullu arlaliuppata arlallit aningaasalersuissallutik.

Ingerlatsineq aserfallatsaaliinerlu piginnittumut(nut) aningaasaqarnikkut aningaasartuutaassaaq annertoq. Taamaattumik aningaasalersuinissamut tunngavissusattut piginnittuuneq pinngitsoorani qulaajarneqassaaq.

Namminersorlutik Oqartussat kommunillu akornanni piginnittoqarnissaa siunniunneqassappat kommunalbestyrelsip Inatsisartullu ilanngutitinneqarnissaanik tunngaveqassaaq. Assersuutigalugu Namminersorlutik Oqartussat aamma Kommuneqarfik Sermersooq suliniummi peqataassappata taava tamanna taamaallaat pisinnaavoq tamatumunnga tunngavissiisoqarsimanissaa tunngavissiinerlu isumaqarluni aalajangiisuniit taamaaliornissamut "akuersisimanissaq". Namminersorlutik Oqartussanut naleqqiullugu siullermik tassaapput Inatsisartut aamma Kommuneqarfik Sermersuumut atatillugu

tassaallutik kommunalbestyrelsi. Aamma piginnittuunerup ilusaa Katuaq isumassarsiffigalugu ilusilersorneqarsinnaavoq.

Nunatta Karsianiit aningaasaliissutit

Aningaasanut inatsisip aaqqissugaanera aamma allaffissornikkut aningaasanut inatsisip suliarineqarnerata ingerlasarnera pillugit Namminersorlutik Oqartussat nalunaarutaat nr. 44, 27. november 2020-meersumi aningaasaliissutit assigiinngitsut allaaserineqarput. § 4 naapertorlugu Aningaasanut inatsit nalunaarummi §§ 5-9-mi allassimasutut immikkut aningaasaliiffiusartunut tallimanut agguarsimapput. Aningaasaliissutit suunerinik toqqaanermut ingerlatap suunera apeqqutaavoq.

Ingerlatsinermut aningaasaliissutit

§ 5 naapertorlugu aalajangersarneqarpoq ingerlatsinermut aningaasaliissutit sullissivinnut imaluunniit allaffissornikkut immikkoortortanut aningaasaliissutini pineqartunut, ukioq aningaasaliiffiusumi ilanngaaseereerluni aningaasartuutini akiliinissamut, aningaasaliissutininut killissaliussaapput. Imm. 2-mi aalajangersarneqarpoq aningaasaliissutini Naalakkersuisunut ilaasortaq akisussaasusooq, missingersuutini tunngavigisat naapertorlugit ingerlatsinermut aningaasartuutini akiliinissamut aamma ingerlatsinermut isertitaqarnissamut, piginnaatinneqarpoq. Imm. 3-mi aalajangersarneqarpoq aningasarsianut aningaasartuutit ingerlatsinermut aningaasaliissutit ataanni taamaallaat akilerneqarsinnaasuut. Imm. 4-mi aalajangersarneqarpoq ingerlatsinermut aningaasaliissutini, sullissivimmuut imaluunniit sullissivinnut imaluunniit allaffissornikkut immikkoortortanut ingerlatsinermut aningaasaliissuteqarnermi pineqartunut atasumik aserfallatsaaliuinermut aamma iluarsaassinernut annikinnerusunut aningaasartuutit, akilerneqarsinnaasuut.

Aningaasaliissutit inatsisitigut pisussaaffiusut

§ 6 naapertorlugu aalajangersarneqarpoq tigusisussat aalajangersimasut tunniussassanik aalajangersimasunik pisinnaatitaaffeqalersimasut Inatsisartut inatsisaanni aalajangersarneqarsimatillugu, aamma tunniussassat annertussusaat imaluunniit naatsorsuinermi tunngavissat inatsimmi immikkoortumi aalajangersarneqarsimatillugit, aningaasaliissutit inatsisitigut pisussaaffigisat atorneqassapput. Imm. 2-mi aalajangersarneqarpoq aningaasaliissutini Naalakkersuisunut ilaasortaq aningaasartuutini Inatsisartut inatsisaannik aalajangersagaasut akilernissaannut piginnaatinneqarpoq. Imm. 3-mi aalajangersarneqarpoq aningaasanut inatsimmi aningaasaliissutini inatsisitigut pisussaaffigisani aningaasartuutissat missiliugaapput, taamaattumik ilassutitut aningaasaliissuteqartoqartinnagu aningaasartuutaanerusut akilerneqarsinnaallutik imaluunniit aningaasartuutikinnerusoqarsinnaalluni. Aningaasaliissutinit nikingassutaasut naatsorsuutini ilanngunneqassapput. Imm. 4-mi aalajangersarneqarpoq aningaasartuuteqarneruneq imaluunniit aningaasartuutikinneruneq, aningaasaliissutininut inatsimmi tunngaviusut allangorsimanerannik pissuteqartoq, ilassutitut aningaasaliissutininut inatsimmi ilanngunneqassavoq, kiisalu aningaasanut inatsit tullermi takkuttussami ilanngunneqassalluni.

Tapiissutitut aningaasaliissutit

§ 7 naapertorlugu aalajangersarneqarpoq tapiissutitut aningaasaliissutit, Naalakkersuisunut ilaasortaq inatsimmi pisussaaffiunngitsunut aningaasartuutini akiliinissamut piginnaatinneqarsimappat,

atorneqassapput. Imm. 2-mi aalajangersarneqarpoq aningaasaliissutini Naalakkersuisunut ilaasortaq pineqartoq, aningaasaliissutit siunertaasa iluanni imaluunniit suliffeqarfinni aningaasaatinut akiliutinut aningaasartuutinut, ernianut aningaasartuutinut, inuussutissarsiortunut tapersiissutinut, sillimmatinut, isumakkeerinerit, taarsigassarsititsinernut assigisaannulluunniit tapiissutitut ilusilinnik aningaasartuutinik akiliisinnaavoq.

Isertitassatut aningaasaliissutit

§ 8 naapertorlugu aalajangersarneqarpoq isertitanut aningaasaliissutit, inatsisitigut pisussaaffigineqartunik taamatullu inatsisitigut pisussaaffigineqanngitsunik isertitaqarnernut, atorneqarsinnaapput. Naalagaaffiup Namminersorlutik Oqartussanut tapiissutai aamma akileraarutitigut akitsuutitigullu isertitat, pissarsianit isertitat, pigisanik nalilinnik tunisinerit, sanaartukkat il.il. isertitatut aningaasaliissutitut allanneqassapput. Isertitanut aningaasaliissutit kisimik aningaasanut inatsimmi isertitanut missingersuutini allassimasinnaapput.

Sanaartornissami aningaasaliissutit

§ 9 naapertorlugu aalajangersarneqarpoq sanaartornermut aningaasaliissutit, sanaartugassanik pilersarusiornermut, pigisanik aalaakkaasunik sanaartornermut aningaasaliinermullu, sanaartukkanut, IT atorlugu periaatsinut allanullu pigisanut nalilinnut aningaasaliissuteqarnerni kiisalu Namminersorlutik Oqartussat taarsigassarsititsinissamut neriorsuuteqarpata imaluunniit kommuninut allanullu sanaartornermut iluarsaassinermullu suliassanut tapiissuteqarpat, atorneqassapput. Imm. 2-mi aalajangersarneqarpoq sanaartornermut aningaasaliissutini Naalakkersuisunut ilaasortaq pineqartoq, sanaartornermut suliassat imm. 1-imi aalajangersarneqartut, aningaasaliissutini suliassamut nassuiaammi aalajangersarneqartutut, ingerlanneqarnissaannut aningaasartuutit akilernissaannut, piginnaatinneqarpoq. Imm. 3-mi aalajangersarneqarpoq sanaartornermut aningaasaliissutit marlunnet avillugit sanaartornermut aningaasaliissutigineqarsinnaapput, tamatuma kingorna Naalakkersuisunut ilaasortaq pineqartoq:

1) Suliassamut neqeroortitsinerup imaluunniit suliariumannittussarsiuussinerup ingerlanneqareernissaata tungaanut sanaartugassamut pilersarusiornermik il. il. suliaraqarnermut aningaasartuutinik akiliisinnaalluni. Suliassaq aningaasaliissutini siunertat allassimasut iluanniissavoq.

2) Aningaasaqarnermut Akileraartarnermullu Ataatsimiititaliap akuersissuteqarneratigut, suliariumannittussarsiuussineq ingerlanneqareerpat suliassat ataasiakkaani ukioq aningaasaliiffiusumi aamma ukiut missingersuusiorfiusuni aningaasaliissutinut killissaliussanik atugassiissutigineqartunik atugassiinnaalluni. Suliassat aalajangersimasut Aningaasaqarnermut Akileraartarnermullu Ataatsimiititaliaq piginnaatitsissuteqartinnagu aallartinneqarsinnaasut, inatsimmi maleruagassanik aalajangersaasoqarsimasinnaavoq.

Nalunaarummi allaaserineqartutut ingerlatap ilusaa aningaasanut inatsimmi aningaasaleeriaatsimik toqqaanermi aallaaviusussaavoq. Aningaasaliinerullu qanoq ittuunissaa aalajangiiffigitinnagu nunap timersortarfissuanik piginnittuunerup qanoq ittuunissaannut aalajangiinissaaq aamma pisariaqassalluni.

Aningaasalissinissamut periarfissat

*NUNATTA TIMERSORTARFIATA SULINIUTIGINISSAANUT PILERSAARUMMI*¹ allaaserineqartutut sanaartornermi aningaasartuutit hoteleqarnani 303,87² million koruuninut hoteleqartillugulu 453,76 million koruuninut nalilerneqarput, ukiut marluk-pingasut ingerlaneranni akilerneqartussat. Tassunga oqaatigineqassaaq tassani pineqarmat naatsorsuineq 2015-imeersoq, taamaattumik aningaasartai 8-10 %-imik ilaneqartariaqarlutik, 2023 tikillugu akit qaffakkiartorneri malillugit.

Suliniuummi pilersaarummi aningaasat ukioq 2015-imi sanaartornermut Naalakkersuisut tamakkiisumik aningaasartuutaasa 45 %-it imaluunniit 67 %-it missaannik annertussuseqarput. Nunat allat atuinerni misillitagaannit timersortarfissuarmik ingerlatsinerneqartut aningaasartuutit timersoqatigiiffinnut attartortitsinerneqartut nunaqqatigiillu ulluinnarni atuinerni matussuserneqarsinnaapput. Taamaattorli nunat allat assigalugit Nuup taamaaqataanik atuisoqarsinnaanginnera isiginiarneqassaaq, taamaattumik ingerlatsinerneqartut aningaasartuutit pinngitsooratik allaanerumik matussuserneqartussaallutik. Sinnerupput illunut hoteleqartumut imaluunniit hoteleqanngitsumut aningaasartuutit. Hotelliliorneqartut nunni tamalaani arsaattarfissuarmik aamma naammaginnartumik attaveqaateqarnissaq pillugu piumasagarnermik inuit pisariaqartitsinerat akuerineqarsinnaapput peqatigisaanillu namminersortut aningaasaliisnaanerineqartut soqutigisaannullu periarfissanik ammaassisoqarluni.

Suliniutip pilersaarutaani eqqaaneqartumi aningaasalersuinissamut periarfissat tulluurtut assigiinngitsut nassaarineqarsinnaapput, matuma kingorna eqqartorneqartut:

Pisortat namminersortullu peqatigiinnerat:

Pisortat namminersortullu peqatigiinnerat anguneqarsinnaavoq Naalakkersuisut kissaataannut naleqqiullugu timersortarfissuarmut ingerlatseqatigiiffik namminersortoq aningaasalersuilluni, pilersaarusiortuni, pilersitsilluni ingerlatsisuullunilu, akerlianilli piffissami aalajangersimasumi timersortarfissuarmik attartornerneqartut akiliisarnissamut pisussaaffeqassallutik. Tamatuma kingorna piginnittuineq Naalakkersuisunut tunniunneqarluni.

Timersortarfinnik isiginnaartarfinnillu pilersitsinerneqartut ingerlatsinerneqartut immikkut ilisimasagartuunneqartut nunarsuarmi ingerlatseqatigiiffiit namminersortut arlalissuupput, aamma suliasumik taassuminnga soqutiginnissinnaasut. Suliniutip pilersaarutaani eqqaaneqartumi ingerlatseqatigiiffik namminersortoq ataaseq, Lagardère Sports & Entertainment, assersuutigissatut ilanngunneqarsimavoq, qanittukku Islandimi nunap timersortarfissuata Laugardalsvöllur-ip saneqqinneqarnissaata imminut akilersinnaaneraneqartut misissuisuusussatut aalajangersimasooq. Tamatuma takutippaa nunarsuup avinngarusimasortaanut nunani tamalaani ingerlatseqatigiiffiit angisuut aamma soqutiginnittut. Lagardère Sports & Entertainment Europami aamma Skandinaviami arsaattarfinnik 100-nit amerlanerusunik ingerlatsivoq aamma Polenimi aamma Ukrainemi UEFA EURO 2012-mik, aamma Frankrigimi UEFA EURO 2016-imik ineriartortitsinerneqartut peqataasimalluni. Aningaasaliinertik iluanaaruteqarfiusumik utertinneqarsinnaasut upperigunikkut suliniuummi soqutiginnissinnaasutut ingerlatseqatigiiffiit taakku naatsorsuutigineqarsinnaapput.

¹ "NUNATTA ARSAATTARFIA PILLUGU SULINIUMMUT PILERSAARUT" ingeniørinik siunnersuisartunit S&M Verkis ApS-imit suliarineqartoq.

² Akit 2016-imeersuupput

Taamatut aaqqissuussinermi suliniummi killeqartumik Naalakkersuisut sunniuteqarsinnaassapput. Aammattaaq aningaasalersuinermit Naalakkersuisut qularnaveeqqusiinissaannik ingerlatseqatigiiffiup piumasaqarsinnaanera ilimanaateqarlunnarluni. Kiisalu taamatut aaqqissuussineq tamakkiisumik akip appartinnissaanut suliniut pillugu Naalakkersuisut aningaasaateqarfinni aningaasanik qinnuteqarsinnaanerinit killeqartitsissaaq.

Aningaasaleeqataaneq:

Sulinerit Naalakkersuisunut eqaannerusumik nakkutiginnissamullu periarfissaasinnaasoq alla tassaavoq ingerlatseqatigiiffik namminersortoq ataaseq amerlanerilluunniit suleqatigalugit aningaasalersuineq, timersortarfiup ilaanik namminersornikkut ingerlanneqarsinnaasumut akisussaaffik tiguisinnaasut. Taamatut aaqqiinermi peqataasut ataatsimoorlutik timersortarfimmik aningaasalersuillutik, pilersaaruserlutik, pilersitsillutik ingerlatsissapput aamma peqataasut piginneqataassutaat naaportorlugit sanaartornermi ingerlatsinermilu aningaasartuutit avitseqatigiiffigalugit. Tamarmik immikkoorlutik aningaasalersuinermi aningaasaleeqataassapput, suliffeqarfiillu assigiinngitsut arlallit peqataasinnaallutik, soqutiginnineq pisariaqartitsinerlu malillugit.

Taamatut iluseqartitsinermi akornutaasoq tassaavoq assigiinngitsunik soqutigisaqartunik aningaasalersuinnissamullu periarfissaqartunik aningaasalersuisunik pitsaasumik pilersaaruserinnissaq qanimullu suleqatigiinnissamik pisariaqartitsinera. Iluseq taanna atornerqarpat naatsorsuutigineqarsinnaavoq pilersaarummik piareersaaneq sivilunerussasoq aamma pilersaarusernermit aqutsinermullu tunngasunik pisortat tungaanniit immikkut suliniuteqarnissamik pisariaqartitsissalluni. Akerlianilli pissarsiffiusinnaasunit assigiinngitsunit arlalinniit akileeataasinnasunik aningaasaateqarfinniillu aningaasanik aallernissamut pisortat periarfissaqassallutik.

Aningaasaateqarfinniit aningaasat aamma aningaasaliisut:

Ilusiusinnaasut pingajuat tassaavoq timersortarfissuup sanaartorneqarnera aningaasaateqarfimmut imaluunniit suliffeqarfimmit aningaasalersorneqartumut tunniullugu, sanaartornermi aningaasartuutit aningaasalersuisussat, kingornalu timersortarfissuup Naalakkersuisunut tunniullugu, kingorna ingerlatsinermi aningaasartuutit tamanut akisussaalersussat. Arsarnerup silarsuani tamanna ilisimaneqarluarpoq, timersortarfiup atserneqarnissaanut pisinnaatitaaffeqarlutik timersortarfiliornernut ingerlatseqatigiiffiit angisuut aningaasaliisarlutik, soorlu suliffeqarfiit Telenor taamaaliorsimasoq Oslomi Telenor Arena-mi. Aningaasaliinerit allanngorsinnaapput aningaasat tamakkerlugit aningaasat ilaannaannut annikitsunut tunngasinnaallutik. Kingumut, ilusermi siullermisulli, timersortarfiup pilersaaruserneranut annertuumik sunniuteqarnissartik Naalakkersuisut naatsorsuutigisinnangilaat aamma aningaasaateqarfiup imaluunniit ingerlatseqatigiiffiup aqutsisuisa aalajangiineri akueralugit. Assersuutitut eqqaaneqarsinnaavoq Ilulissani Kangiata Illorsua, aningaasaateqarfimmit Realdania-mit aningaasalersorneqartoq. Kangiata Illorsuanut missingersuutit tamarmiusut 152,3 mio. kr.-it missaaniissimapput, aamma Namminersorlutik Oqartussaniit aamma Avannaata Kommunianiit akileeataassutit 23 mio. kr.-iullutik Realdania-miit 108 mio. kr.-iusut. Kangiata Illorsua tassaavoq Greenland Visitor Centerip ataani suliffeqarfik imminut pigisoq. Taamaaqataanik Nunatta Eqqumiitsulianik Saqqummersitsivianut siulersuisut sulipput, pisortaniit aningaasaliisoqassasoq nalunaarutigineqarsimalluni, sinnerilu aningaasaateqarfinnit attuumassuteqartunit arlalinniit qinnutigineqassallutik. Illu naammassineqarpat Namminersorlutik Oqartussanut tunniunneqarumaarluni.

FIFA:

Aaqqiinerit sisamaat tassaasinnaavoq Kalaallit Nunaata FIFA-mi ilaasortaanissamut qinnuteqarneranut atatillugu FIFA-miit aqutsineq tapersersuinerlu pissarsiarineqarluni, timersortarfissuup aningaasalersorneranik tigusilluni. Tamanna periarfissaasinnaavoq, pissutigalugu nunarsuarmi avinngarusimasunut tamanut arsarnerup ingerlanneqalernissaa FIFA-mit annertuumik pingaartinneqarmat aamma arsarnerup siuariartorneranik tapersersuisutut ilisimaneqarmat, aningaasalersuinikkut siunnersuisarnikkullu.

FIFA 2022-miit timersortarfissuit immikkoortiternerinut imatut nutaamik piumasaqaatinik aalajangersaasimavoq:

Suuneri	Piginaasaq annikinnerpaaq	Siunertaq
1	40.000	Arsaattarferujussuaq, nunanit tamalaaneersunik anginerpaanik kiisalu liganik inuussutissarsiutigalugu arsartartunut aaqqissuisinnaasoq. (assersuutigalugu FIFA-mi nunarsuarmi pissartanngorniunnerit)
2	20.000	Arsaattarferujussuaq, klubbit angisuut pissartanngorniunnerinut kiisalu nunat tamalaat unamminerinut aaqqissuussisinnaasoq.
3	10.000	Inuussutissarsiutigalugu arsaattarfik akunnattoq, klubbit pissartanngorniunnerinut aamma nunat tamalaat unamminerinut/naggataamik unamminerinut annikinnerusunut aaqqissuisinnaasoq assersuutigalugu inuusuttut pissartanngorniunnerinut.
4	3.000	Inuussutissarsiutigalugu arsaattarfik mikinerusoq, klubbinut mikinerusunut aamma nunani tamalaani gruppini unamminerinut mikinerusunut aaqqissuussisinnaasoq, assersuutigalugu inuusuttut pissartanngorniunneri.
5	250	Arsaattarfinnut sunulluunniit FIFA-mi pitsaassuseq minnerpaaq, ineriartortitsinernut kiisalu sumiiffimmi atugassaq.

Pissarsiffik: <https://stadiums.fifa.com> Football Stadiums Guidelines 2022 FIFA

Pisortanit pigineqartoq ingerlatseqatigiiffik aningaasaliisartoq

Aningaasalersuineq aamma pisortanit pigineqartoq ingerlatseqatigiiffik aqutigalugu pilersinniarneqarsinnaavoq soorlu Namminersorlutik Oqartussani Illuut A/S.

Illuut A/S-ip siunertaraa illunik sanaartorneq pigisaqarnerlu, tulliatullu tunisineq attartortitsinerluunniit. Ingerlatseqatigiiffilli Aningaasanut inatsisikkut aningaasat immikkoortinneqarsimatillugit taamaallaat illuliorsinnaavoq kingornalu suliniutinut piviusunngortillugit. Namminersorlutik Oqartussat tassunga atatillugu illut sanaartornerinut pisortatut taarsigassarsisitsissapput. Ingerlatseqatigiiffik pilersinneqarpoq Namminersorlutik Oqartussat sanaartugassat ingerlatseqatigiiffiup atuinerani taarsigassarsiniartarfiit aningaasaliissuteqartarnissaannik angusaqarsinnaaqqullugit.

Nunatta timersortarfissuanik ingerlatsineq

Timersortarfik ingerlanneqassaaq, aserfallatsaaliorneqarluni akuttunngitsumillu nutarterneqartassalluni. Nunanit allaniit paasineqarpoq atuisut akiliutaat ingerlatsinermi aningaasartuutit ilarujussuinut matussutaasartut. Tamannali Nuummi allaanerusinnaavoq, tassa atuisinnaasut amerlassusaat killeqarmata. Taamaalilluni naatsorsuutigineqarsinnaavoq ingerlatsineq allaanerusumik aningaasalersorneqartoq. Nunatta timersortarfiata suliniutiginiisaanut pilersaarutaani missiliorneqarpoq timersortarfissuarmut qulisamut illunik ukiumut ingerlatsinermit aserfallatsaaliuinernullu aningaasartuutit 3.127.000 kr.-iussasut hoteleqartumullu 3.905.000 kr.-iussasut. Ingerlatsinermi aningaasartuutit suliniummi pilersaarummi naliliinermi piffissami qaammatini qulini ullut tamaasa nalunaaquttap akunnerinik arfineq pingasunik atuineq naatsorsuutigineqarpoq, aamma illut pillugit ukiumut aningaasartuuteqarluni, tamatuma kingunerisaanik akiliutit (erniat + akilersuutit) taarsigassarsiat piffissami akilersornerini tamarmi assigiillutik.

Kommunimiit aamma Nunatta Karsianiit aningaasaliissutit

Suleqatigiissitap isumassarsiffissatut Kalaallit Nunaanni Kulturikkut Illorsuaq, "Katuq" isiginiarsimavaa, taanna kommunip namminersorlutillu oqartussat akornanni pigineqarluni "ataatsimoorullugulu ingerlanneqarluni".

Kalaallit Nunaanni Kulturikkut Illorsuaq, "Katuq" ukiumut 35 mio. kr.-it missaannik kaaviiartaqartarpoq. Taakkununga Nunatta Karsianiit kiisalu Kommuneqarfik Sermersuumiit ukiumut aningaasaliissutit 10 mio. kr.-it missaaniittut ilaapput. Aningaasaliissutit suliffeqarfimmut imminut pigisumut Katuqumut tunniunneqarput. Aningaasaliissutit amerlassusissaat Kommuneqarfik Sermersuup aamma Kalaallit Nunaanni Namminersorlutik Oqartussat akornanni isumaqatigiissutigineqassapput tamarmik 50 %-inik akiliisussanngorlugit.

Illuutigineqartoq immini, Kalaallit Nunaanni Kulturikkut Illorsuaq, soqutigisaqatigiinnit Kommuneqarfik Sermersuumit aamma Namminersorlutik Oqartussanit pigineqarpoq. Kalaallit Nunaanni Kulturikkut Illorsuup I/S-p ineqarnermut akiliutitigut isertitat aqqutigalugit Kulturikkut Illorsuup ingerlaavartumik aserfallatsaaliorneqarnissaa isumagissavaa. Suliffeqarfik imminut pigisoq Katuq Kalaallit Nunaanni Kulturikkut Illorsuaq I/S-imi attartortunut marluusunut ilaavoq. Suliffeqarfiup imminut pigisup Katuq aserfallatsaaliuinissamut akisussaaffiit tunngasuni illup iluani annikitsunik iluarsaassat killeqarput, tak. attartornermut isumaqatigiissutip imarisai. Katuq iluani silataanilu aserfallatsaaliugassat iluarsagassallu tamarmik Kalaallit Nunaanni Kulturikkut Illorsuup I/S-p isumagisarai. Kommuneqarfik Sermersuup aamma Namminersorlutik Oqartussat aserfallatsaaliinermit kiisalu iluarsartuussinermit aningaasartuutit avittarpat.


Kommuneqarfik Sermersuup maluginiarpaq nunatta timersortarfissuanik aningaasalersuinermi kommuni kisimiissinnaanngitsoq siunnersuutigalugulu kommunit tamanit aamma Namminersorlutik Oqartussaniit ataatsimoorluni aningaasalersuisoqarsinnaaneranik misissuisoqassasoq.

Taamaaqataanik aqqissuussineq nunatta timersortarfissuata ingerlanneqarneranut atorneqarsinnaavoq, tassani Naalakkersuisut Kommuneqarfik Sermersuup peqatigalugu ukiumut procentinik aalajangersimasunik aningaasaliisarlutik.

Suliniutit attuumassuteqartut

Kommuneqarfik Sermersooq ilisimatitsivoq Nuup timersortarfianik nutaamik pilersitsisinnaaneq periarfissaalersillugu kommunimut pilersaarummut tapiliussamik peqarlutik³.

Kommunimut pilersaarummut tapiliussaq aqquutigalugu kulturikkut niuernikkullu qitiusoqarfinnik pilersitsisoqarnissaa periarfissinneqassaaq, assersuutigalugu nutaamik timersortarfissualiornikkut, ataatsimeersuortarfiornikkut, akunnittarfiornikkut, katersugaasiviliornikkut saqqummersitsiviliornikkullu, kiisalu inuussutissarsiuteqarfimmi pioreersumi 3B1-imi nutaamik inuussutissarsiuteqarfiliornikkut. Illoqarfiup ilaa taamaalilluni immikkoortunut pingasunut agguarneqarpoq:



Titartagaq 1: Kommunimut pilersaarummut tapiliussaq 2C4-1, sinaakkusiussani killigitat pioreersut immikkoortullu ilaa nutaaq titarnernik aappaluttunik ilisarnaateqarput.

Immikkoortut 1 aamma 2: Nuummi nutaamik timersortarfissualiornissaq periarfississavaa, aammalu kulturikkut qitiusoqarfiliornissaq soorlu katersugaasiviliornissaq, saqqummersitsiviliornissaq, takornarianut qitiusoqarfiliornissaq niuernermullu tunnganerusunik suliffeqarfiliornissaq, soorlu akunnittarfinnik, ataatsimeersuortarfinnik assigisaannillu sanaartornissaq.

Immikkoortoq 3: Inuussutissarsiuteqarfimmik nutaamik pilersitsinissaq periarfississavaa, ilaatigut qatserisartoqarfik aamma tamaaniissalluni - ullumikkut Nuup qiterpasissuani inissimasoq.

Kommunimut pilersaarummut tapiliussami uku allassimapput:

Una tapiliussaq immini kommunimut pilersaarummut tapiliussat 37-saat uunga "Nuummut pingaarnertut aqqiussuussaq nutaaq"-mut pilersaarummut ilanngunneqarpoq. Kommunip pilersaarutaanut tapiliussani 37-ni nunaminertat tamarmik pilersaarummut Nuuk City Developmentimut (NCD) ilaapput, aamma

³ Kommunimut pilersaarummut tapiliussaq 2C4-1

nunaminertat tunniunneqartut kommunip illoqarfimmik ineriartortitsinermut suliniutaanut toqqaannartumik tunniunneqarlutik. Nunaminertat Kommuneqarfik Sermersuumit imaluunniit Kommuneqarfik Sermersuup toqqaannartumik toqqaannangitsumilluunniit 100 procentimik pigineqartunut ineriartortitsinermut peqatigiiffiusunik atorneqarsinnaavoq siunertanut pisortatigoortumik atugassatut siunertanulluunniit namminersortunit atugassatut.

Kommunimi Pilersaarusiornermut immikkoortortaq aamma imatut ilisimatitsivoq:

Immikkoortoq naleqqulluinnarpoq, tassa illoqarfiup ilaanit assigiinngitsuniit tikinneqarsinnaasuni qitiusumik inissisimammatt, qularnangitsumillu taakkununga atasunik biilnut uninngasarfissanut naammattumik inissaqarluni.

Inerniliineq

Nunatta timersortarfissuanut aningaasaliisinnaasussanik periarfissanik misissuinermi siunertaq tassaavoq FIFA-p piumasaqaatai malillugit nunani tamalaanisut angitigisumik ivigaarartalimmik nunatta timersortarfissuanik qulisamik sanaartornissaq. Kalaallit Nunaata nunani tamalaani arsarluni pissartangorniunnerni peqataasalernissaanut periarfissanik tamanna ammaassissaaq. Nunatta timersortarfissuata Kalaallit Nunaat nutaarluinnarmik inissisimalersissinnaavaa, Kalaallillu Nunaata arsarnikkut siunissanut nalinginnaasumillu timersornermut qanorpiaq kinguneqarsinnaanera aalajangeruminaalluni.

Suleqatigiissitaq naliliivoq *NUNATTA TIMERSORTARFIATA SULINIUTIGINISSAANUT PILERSAARUMMI 2016-imeersumi* allaaserineqartutut nunatta timersortarfissuanik sanaartortoqassappat Kalaallit Nunaanni nunap sanaartukkaatigut aqqissuunneqarnera misissornissaat pisariaqartoq. Kalaallit Nunaanni maannakkutut attaveqaatini nunatta timersortarfissuanik anginerusumik sanaartornissamut FIFA-p piumasaqaataanik naammassinnittoqarsinnaanngilaq, assersuutigalugu nunat tamalaani arsarlutik pissartangorniunnerini atorneqarsinnaasumik. Tassani sanaartornermut illuliornermullu attuumasunik atortunik, kuuffeqarnikkut aqqissuussinernik pissutsinillu allanik erseqqinnerusumik misissuisoqarnissaanik pisariaqartitsissaaq.

Suleqatigiissitamik kaammattuutigineqarpoq kalaallit nunaanni inuiaqatigiinnut tassanilu nunap sanaartukkatiqut aqqissuunneqarnera tulluarsarneqarsimasumik arsaattarfissuarmik sanaartortoqarnissaa isumaliutigineqassasoq. Aamma oqaatigalugu nunatta timersortarfissuanut aningaasalersuisussanik nassaarniarneq ilungersunartuussasoq, tassa nunap timersortarfissua pillugu pilersaarutinit erseqqissumik atorfissaqartitsisoqarmat, tassani erseqqissumik takuneqarsinnaallutik piginnittuunermi pissutsit, pisortat aningaasalersuinerat il.il. Tamatuma saniatigut suleqatigiissitamit oqaatigineqarpoq arsarartut kattuffiat KAK maannakkut CONCACAF-imit ilaasortangorniarluni qinnuteqartoq, tamannalu FIFA-p piumasarisaanit annikinnerusunik timersornikkut atortunut annikinnerusunik piumasaqaateqartunik Kalaallit Nunaanni VM-imut anggunniunnermi unammiuartitsinissamut periarfissanik ammaassissalluni.

Suleqatigiissitamit aamma kaammattuutigineqarpoq piginnittuuneq Namminersorlutik Oqartussat aamma kommunip akornanni avinneqarpat tulluassasoq, soorlu Kalaallit Nunaanni Kulturikkut Illorsuarmi Katuami taamaattoqartoq. Kommuneqarfik Sermersuulli taamaattoq oqaatigaa nunatta timersortarfissuanut nunaminertamik atugassanngortitsinissamut peqataasinnaallutik, maannakkulli piginneqataasutut kommuni suliniummut ilaasinnaanersoq oqaatigisinnaanagu. Tamanna Namminersorlutik Oqartussaniit aamma kommunalbestyrelsimiit politikikkut isummernissamik pisariaqartitsissaaq.

Nunatta timersortarfissuanut aningaasaliisussarsiorluni sulineq aallartitsinnagu pingaarpoq aningaasaqarnikkut pisariaqartitat anguniakkallu suunerisa paasineqarnissaat. Taamaattumik pingaarpoq aningaasaliisussarsiorluni sulineq aallartitsinnagu suliniummut taamatut annertutigisumut aningaasanut inatsisikkut aningaasanik immikkoortitsisoqarnissaa. Aammattaaq pingaarpoq tassunga atasumik piginnittuunerup inissinneqarnissaa, tassa timersortarfiup piginnittunut eqqortunut taassumalu siunissami ingerlannissaanut tunniunnissaanut pilersaarummik peqartoqarnera aningaasaliisinnaasunut pingaaruteqarmat.

Tassunga ilanngullugu pingaarpoq attaveqaatinik nukittuunik peqarnissaaq atassuteqarfissanillu nassaarnissaaq, tassa tamanna aningaasaliisartut eqqortut nassaarinissaannut pingaaruteqarluinnarmat.

Tamatuma saniatigut pingaarpoq Kalaallit Nunaanni nunatta timersortarfissua pillugu suliniummut naleqqunnerpaasinnaasunik aningaasaliisinnaasut kikkunissaasa paasineqarnissaa.

Taamatut annertutigisumut suliniummut aningaasaliisinnaasunut nassaarniarnermut isumaliutigineqarsinnaasoq tassaavoq soqutigisaqaqatigiinnik aamma/imaluunniit aqutsisoqatigiinnik imaluunniit suleqatigiissitamik pilersitsisoqarnissaa, timersornerup silarsuani sinniisunik pimoorussisunillu inuttaqartoq, nunatta timersortarfissuanik pilersitsiniarnermi suliaqarusuttunik. Taamatut suleriaaseq Nunatta Eqqumiitsulianik Saqqummersitsivianut siulersuisunit atorneqarpoq.